









石西集卷四

祁門汪子祐受夫著

同族後學耀麟叔定選輯  
五世孫宗豫武山校梓

詩

癸亥年

計一百三十八首  
選二十七首

郊外初晴二首

平堤五六里。矮屋兩三家。石竹猶含籜。海榴初放花。開門迎野客。煮豆試新茶。坐對渾無事。林泉意亦賒。鳥磴循岡外。雲林隱谷西。向人山鬼笑。戀母子烏啼。積濕陰初散。層厓未可梯。好風輕襲袷。盤榼會須携。

絕句



曉起昏昏集曙鴉。欲明未明雲陰斜。南風一夜蒸時雨。無數庭前滿荳花。

避暑郭西亭圃

長夏昏昏思不禁。郭西亭圃好登臨。風輕白葛似無暑。午近綠槐方有陰。常愛醉人當從事。不知音者莫招尋。青蠅野馬出塵想。獨鶴閒雲符夙心。

貧病

夜讀朝慵起。晨餐午未炊。邇來貧亦樂。真與病相安。德爲三尺錄。言將四海知。科頭忘日暮。倚杖步雲遲。

夏暮遣懷三首

蕪園僻逕亦佳尋。竹几藤床翫午陰。六月欲過餘少夏。

千峰常對着孤吟。冰盤敢憶深宮惠。寶劍空懸出匣心。爲愛去來陶隱士。許多丘壑待登臨。屋上好山青不改。堦前碧水閒自流。道人醉矣夢初覺。裹足悠然吟未休。黃石既能教孺子。赤松元不避留侯。一番新雨應時節。兩腋生涼恰似秋。儒風籍籍藹山城。底事營營競戰爭。富而無禮乃無耻。道之不明斯不行。生憎荇帶隨波挽。靜愛葵心向日傾。獨坐小齋窮子史。浮雲過眼一毛輕。

絕句三首

萬仞蓮峰逼太清。五雲縹緲護金莖。玉簫聲宵不知處。恰有僊人頂上行。



高梧十尋陰復陰。羽葆亭亭滴翠深。白晝一塵元不到。  
鳳凰應有結巢心。澄潭百丈靜無波。潭底潛龍夢正多。  
潭上震雷久不作。九天雲雨竟如何。

早秋雜感四首

聞與參玄鬢欲絲。微言隻字是吾師。杜陵最苦一秋興。  
宋玉寧忘千古悲。乞食向人元有約。長盃加我不須辭。  
十洲五嶽遙相待。竹帽芒鞋任所之。柴扉深閉綠依依。  
一任浮生發殺機。不辱久懷和氏璧。孤高猶嚙首陽薇。  
箇中有樂鳴風雅。意外無人問是非。翹首玉城天尺五。  
石林廊廟肯相違。

獨立高樓思杳茫。涼風颯颯吹衣裳。鳴鷄吠犬連村曙。  
舞檜撐柁滿目蒼。得失一生都夢寐。歌吟萬古此行藏。  
主恩臣節懸青史。皎日孤雲渺大荒。幾年頤晦臥林丘。  
衣食驅人半是愁。老病苦吟無一字。流光汎隙又三秋。  
敢勞車馬頻頻問。寧負蒼生故故留。枳棘載途橫弋網。  
長風不繫五湖舟。

曉起遣懷

啟戶迎清曙。飛嵐滿目迷。貪涼酣竹簟。破夢過鄰鷄。  
燈下書仍展。林間酒欲携。晨餐從爨冷。屢空愧山妻。

山中訪隱者

确磴山田入谷遲。荒涼石隴覆頽碑。晴峰點點碧如洗。



老樹枝枝青出奇。不約而來高興發。長酣只許故人知。  
酡顏皓髮還相與。笑倚霞城岸接巖。

入谷

和稻獻雲疇。風高草樹柔。老農頻薦味。狂客獨傷秋。  
日薄薜蘿舞。山空魍魎游。何因覓知己。眺咏鬢銷憂。

獨行

日杲秋猶暑。林棲髮欲華。獨行銷白晝。得意見黃花。  
稻熟莖莖穗。薑肥片片芽。竹堤香漸近。水次有漁家。

穫稻南郊

老農新迓踏新晴。應是南郊早穫成。事冗豈妨田圃樂。  
情多偏愜鵲鳥聲。鐘鳴水寺僧齋罷。花壓桐岡妓眼明。

敢負主恩還炙背。乃知粗糲自深耕。

存沒口號四首

素髮疎癯一老翁。秋風此日嘆飄蓬。凌空一鶴宵何許。  
多在蓬瀛濤霧中。

淮海風流坐釣槎。白鷗浩蕩對烏紗。青山不老紫芝長。  
還擬歸來鍊玉華。

逝水東迴蘸碧波。好山東障亂雲蘿。酡顏皓髮山中叟。  
時把雲芝放浩歌。

百韻不聞人籍籍。一丘猶見草青青。西風浙瀝催時事。  
忍聽高原叫鶴鴒。

秋晴



石西集卷四  
四  
稻穫田田瑞秋登日日晴雲根看鳥迹樹杪聽泉聲菊  
瘦悲元亮瓜肥愛邵平晚成思學圃得意亦忘生

杪秋有懷

淡日疎雲度野橋柳堤風色正蕭蕭殘秋已過二之一  
百歲誰同松與喬自信苦吟生白髮何須決勝戀金貂  
樵林釣石還相待塞鴈湘雲漫寂寥

歲暮

大運迫輪迴原初亦告終蕭條守冬餘層冰復霜風敢  
云舌尙在無乃詩應窮饑寒苦相驅枳棘迷西東錦衣  
誰袞袞皂帽獨怱怱掩卷四睥睨長飈颿輕鴻中原日  
多事豈暇較垂通歛襟詠歸來聊以酬歲功

甲子年

計一百九十三首  
選一十三首

春日陪王石龍經博過先兄槩菴先生草堂先生

已祀鄉賢母妻俱節婦

古道孰云泯斯文耿有光五經新博士苦槩舊賢堂兩  
節鳴京國遺言起憲章敬思高第在風日藹門墻

美泉池亭

萬峰臨檻靜二水擁亭虛野客笑呼酒幽人親網魚菊  
花黃上鬢蕉葉碧留書不是耽疎放其如壽散樗

重九

寒多重九喜初晴復有蓮峰當檻明點石小花無俗色  
坐林幽鳥亦新聲登山自信非吾事落帽從教笑後生



石西集卷四  
五  
翹首故園三徑在朔雲風竹不勝情

曉起

素色凌疎鬢嚴威逼隱廬如何頻鵲喜或至小兒書句  
喜花生筆篇寒字走魚斐然吾黨友狂簡欲歸與

慕松別墅得風字

弔古探奇氣已雄慕松別墅穀城東殘花點點黃欹白  
老樹依依碧亞紅暇日謾乘何暮景淹才拔萃亦高風  
聽潮莫動終天念竹竿蔬盤樂事同

穀城漫興

水水山山故獻奇行行坐坐亦新詩廣文也辦登臨屐  
村店都膽絕妙辭白社謾勞頻致款素絲何事苦生悲

西風忽送霜前鴈薄暮長亭有別離

歸度禾成嶺寄李赤源

谷轉鄉園路不遙峰盤禾成入層霄溪頭野店猶迢遞  
田里人煙謾寂寥一水破厓懸玉練千林浮葉鼓寒飈  
應懷道德同盟子爲道還山有病樵

自美溪歸草堂漫興四首

目曠羣峰小情高一榻閒敢勞歌易水誰復起商山尾  
驥蠅從附巢松鶴已還丹梯猶咫尺畏足未須攀  
尚友巡鄉國推言作聖功狂猶饑曼倩賤不愧梁鴻逆  
旅煙霞外多愁老病中歲華容易改何日兆非熊  
寒陰何寂寂曙氣復霏霏勁別松楸古豐餘鼠雀肥憚



石西集卷四  
勞能用拙聞過樂知非最愛窗前日因依坐翠微  
亥月歸茅屋門桃媚小春何貪真自得汎愛敢辭貧有  
債村村樂無私物物新班荆時謔笑濁酒過比隣

偶懷

霜林浙瀝舞松潮臘意凝寒湛碧霄偶有好書難釋手  
頻來悍吏故征徭窮途豈爲高人厄短序都從一醉銷  
皓首友生誰可仗天涯猶憶鴈書遙

二十五日立春

殘年風雨夢初醒忽報春光到野庭意外梅花仍可折  
愁中鼓吹不須聽形忘已許樽前頌德立何孤座右銘  
歲事愴惶窮莫問松簷倚杖眼偏青

乙丑年

計四十八首  
選十七首

人日

得人宐此日細霧擁疎簾晦入少陵興新從方朔占剪  
花春彩勝生菜野盤甜冰雪猶遮眼何時醒滯淹

望中偶題

陌上輕楊暉翠條風前鶯意似相招厓煙漠漠雨應近  
逕草萋萋人尙遙大半青春經夢過無多白日逐愁銷  
山桃數點寒猶禁尺素詩筒謾寂寥

雜詩四首

首夏亦蒸鬱茅堂何蕭條蹊岐多嶮巖登頓散凌超知  
達旣恬退庸愚逾佚驕望道窮眇默懷憂翻寂寥滄漸



石西集卷四  
七  
懼蘭芷莽遺等艾蕭蕩蕩蓬瀛盟寤寐懸松喬靜泊托  
神契雲林余從招

楹庭有嘉樹陰盤晝可息交加無蠹枝蒼翠藹瑞色竹  
榻時一馮聊以滌胸臆爽霧涼浮襟幽禽手取食再詠  
田園篇悠然會無極每恐出此外杲陽灼榛棘

褐蔬足充淡水石何嫌貧陟眺謝不負閒投陳可因孰  
云無端倪元化本比鄰豈以樂減憾猶防偽混真高風  
涵區寰望望起沈淪而來下士笑得與羲皇親白浪宵  
漫漫荒丘填九垓絲岐易灑淚咫尺迷遙津

去國既遐疎寓形冀自適乃知箕穎操肯爲巖廊易一  
日不乘閒百年徒可惜四顧啟玄圃紛營逐幽宅其如

益受謙敢意鼎承華志遠慎從邇懷今惶玷昔琴樽聊  
馮娛萬愁斲一釋

午後蔣石屋至

夢覺昏昏已過午扶筇岸倒青綸巾竹間獨立見君子  
雨後涼生來故人瑣闥誰云棄敝屣乾坤已解容閒身  
鄰家酒熟共一醉好合斯文非爲貧

獨往

獨往誰知已青林着病樵稻肥秋欲半露滴暑初消穩  
自畱山屐煩應棄樹瓢步虛塵外想洞口有雲簫

茅莊

茅莊乃在澗之濱策杖而來舊主人竹栢手栽忽長大



石西集卷四  
垣扉時改亦鮮新  
梁間燕語欲辭社  
石上梧陰初過鄰  
水稻接疇微小稔  
老農何吝瓦盆春

哭竹菴兄三首

有序

兄諱禘字誠夫清介有爲別號竹菴與先君相得最深余幼失怙撫愛切至奄及晚年情好彌隆殘秋永訣痛哉

空林行白雨石谷擁寒雲  
蕭氣傷秋暮哀音失鴈群  
禮書猶子在樽酒許誰分  
獨對菴前竹蕭蕭不忍聞  
昔也甫何怙友哉兄最憐  
鞠提常有誨仁讓每相先  
德藝斯文社湖山處士緣  
英聲推里閭皓首野情偏  
愛竹尚留屐臨菴不見兄  
紫霞封故鼎丹旒表遺名  
七

千古來壽百年何限情  
音容如不泯沒世有心耕

過田家復尋溪寺

竹梧深處散秋烝  
田父招要慰昔曾  
可計歲功頻問稼  
忽關禪興獨尋僧  
峰頭杲日凌丹樹  
石面寒英點碧藤  
野水一汀空法界  
諸天天外會須登

閒居喜鄰溪至

層林散輕陰  
茆堂亦虛疎  
舉帷攄素懷  
餘有此琴書  
調拂走紋腹  
檢搜驚伏魚  
乃識區寰間  
而容閒索居  
玄冥既引領  
臥坐還躊躇  
寧能諧同盟  
迢遙來巾車

病起酌兩峰兄草堂

晴峰點點入筵高  
病起兄家試濁醪  
不出經旬猶夢寐



石西集卷四  
將來五十尚林臯愁忘火候封丹竈喜接文光照白袍  
且進一樽怡小叙忍看霜雨泣弓刀

殘年雨夜雜感二首

晏歲悠悠繫遠思寒宵落落析行遲燈前霰雨百千點  
枕上千戈十二時幻世陰符渾醉夢堆床聖典自吾師  
還應直造羲皇上角技從教笑後期

紅塵絡繹競茫茫利慾興戎舌合藏莫道囊空無粟帛  
也知筆下有文章燈花半壁傳春喜鼓吹比鄰送歲忙  
明日啟關探晚節想應松栢正蒼蒼

石西集卷四終

石西集卷五

祁門汪子祐受夫著

同族後學耀麟叔定選輯  
五世孫宗豫武山校梓

詩

丙寅年

計六十九首  
選三十首

絕句五首

七日八日連晴明宜穀宜人雙喜生浩蕩草茅被寵渥  
會將歲事頌昇平

碧雲岡上最高樓誰家美人樓上愁青春易擲朱顏改  
腸斷關河淚未收

東望滄溟紫氣橫群僊想見集蓬瀛可憐鶴髮珠林客



獨坐峰頭吹玉笙

霜後輕寒最襲衣  
蕭疎草樹意全微  
幽尋且莫急生事  
坐谷愁鶯何日飛

直道何嗟行路難  
巾鞋隨處罄交歡  
錦囊藥物時堪把  
粒粒光生白玉盤

山寇篇

有序

時澗西礦賊犯休  
婺二界聲言越境  
民心惶惶郡符  
復徵鄉丁巖籩  
應敵繁徭瘠土  
其何以堪庶務  
農時恐斯殆矣爰志寇

流移恣囂囂烏群  
倏臻散王制息恒  
產竊玩亦叛竄無  
乃需徭驅敢曰互  
餒絆石玉渾漚燹  
閭里藉塗炭蓬集

走埃霾訓練遑  
暝旦檻兇尙懷野  
釜鱗寧避斃時陽  
候已溫凌遺卽見  
泮其如農務何庸  
詎墜籍貫貂券果  
何爲尸素茂貞幹  
衰頽懸令則淆潔  
白洞斷北極垂端  
明星日列炳煥何  
應領捷凱抱膝一  
惋歎

送友人之錢塘兼寄西岡兄廉夫

二月春應半武林  
帆正開柳淡和靖  
島花散越王臺白  
髮誰知已青山舊  
酒盃布袍岡上約  
浪暖好歸來

春日獨遊二首

郭外行春日日同  
虛亭弱線不禁風  
牽愁逕草芃芃碧  
可惜汀桃泛泛紅  
瞬息百年俱寄客  
蕭疎兩鬢忽成翁  
浣花杜曲今存否  
欲寫新詩附小筒



莫怪高陽老酒徒，麴生有約不須呼。山樓好事想如舊，  
昔日同心今似無。償債村村迎子美，打乖字字愛堯夫。  
頽波直下誰能挽，卽看翻紅雨滿途。

汪村胡氏莊

闢草瞻先塚，馮山坐古莊。春殘花事懶，雨足歲功忙。笋  
折莖莖脆，茶新片片香。路岐多虎豹，此處可修藏。

立秋日草堂述懷二十四韻

杲日驅殘夏，金飈下井梧。火雲猶未斂，時雨忽來蘇。四  
序流應半，衰顏強更扶。艱難那可仗，韜韞不須沽。蔡宋  
非吾土，斯文厄大儒。壘堦慚卞璞，彈鵲泣隋珠。虎迹狸  
方混，鷄群鶴自孤。慙雖妨逆浪，終擬逸亨途。焰已銷銅

雀閒應戀白駒，血凝中散鍛香藹。步兵厨綬綬，含三畏  
簞瓢賸一區。何羈元蹙蹙，甚愛尙踟蹰。砥柱誰能挫，榛  
茅已待誅。冥冥卑陷穽，皎皎起康衢。禮爲林泉簡，狂從  
志氣迂。德音曾舉案，風槩亦當壚。用拙豈懷寶，機投敢  
惜軀。虛名珍一顧，悟道反三隅。螢究篇篇徹，苗徵粒粒  
輸。聖人端拱位，逋叟乞恩殊。近鍛終期翥，常饑肯受呼。  
匪吾從齟齬，適意且交娛。皂帽寄南服，丹書懸北都。何  
時携竹杖，寒衽看冰壺。

愁羈二首寄諸生

白髮誰知己，青山戀舊游。欲謀終日醉，了此一年秋。躑  
躅麒麟閣，侏儒翡翠裘。萬方猶鉄甲，高枕自南州。



鳥喙還應避龍鱗不可批醉携原上鋪饑鍛石中泥正  
氣逼青史微言膺白圭眷時寧忍辱餐玉笑□齊

秋望

稻熟秋應半涼生病欲蘇赤霄鳴翡翠仁藪臥騶虞白  
骨無收主青山有餓夫松濤行絕壑曲磴入平蕪

歸來篇

有序

秋仲廿五兄廉夫歸自臨安倏忽三年之別兄七十  
已逾去年余五十又明年矣草堂相對鬚鬢皓然把  
酒長笑作歸來篇

與兄別忽三年隔一笑相逢頭各白獨立亭亭矍鑠翁  
歸來海上山中客青山白髮弟兄難逕竹庭槐次第看

臘醞光浮青竹葉秋鷄味壓黃金盤慙慙不惜傾丹素  
一筋一樽同旦暮厚積應知世業成多聞却被儒冠誤  
金飈颼颼天氣涼四顧涼陰翻茅堂八月將殘九月近  
池蓮欲卸林桂香此時此景宜愜樂安得朱顏駐大藥  
肅氣徐看萬卉凋明朝未必能如昨遐心自覺俗相違  
黑白雌雄多是非爲誦歸來賦茅屋胡麻已熟紫芝肥

遊青峽岡

涼飈颼好秋淑霽豁洞杲雲林振逸懷清旦愜妙賞灑  
灑露尙屯燁燁日已丈碕礧多恠態沸激豈俗響物理  
有真閒煙霞無雜想生慮倘以廓紐錮自罣網况復值  
獲歛歲功得遂養撫摭當及茲瞬息一草莽



偶題

晝短日難挽秋高風易尖松聲翻破屋竹色染疎簾篆  
璞嫌應腐鉛刀喜亦銛萬愁消一醉此意只陶潛

秋暮西城晚眺

獨倚西城醉眼長殘秋晚色正蒼蒼  
厓楓石菊各幽事喜鵲慈鴉共夕陽  
漠漠市煙浮雉堞颼颼徑竹入瀟湘  
分陰好爲登臨惜一卷寒燈夢草堂

晚霽獨坐

索居宜晚霽抱膝獨吟哦醉後音偏雅  
名先忌最多素餐閒廩鼠貪炤促燈蛾  
環堵何須鑰貧防少客過

立冬草堂遣興

懶出經年意更慵孤吟不是秘霞蹤  
心懸玉闕四千里家在青山一萬重  
破帽敝裘宜晚節黃花碧酒亦初冬  
眼前物物皆吾與豈必迎人說勝逢

閏十月望後二日孫城生

有序

余紀歲失怙又多病寡兄弟老母徬徨含涕撫鞠其  
不續幾如線矣今將五袞已幸三子時復產孫似大  
過望哀哀考妣恨不目覩承德食報寧敢無言  
垂髫悲失怙晚節喜生孫老病仍詩癖窮居只席門  
試啼家有慶增愧祖爲尊何幸瞻三代心耕澤尚存

示在學弟姪三首

聖皇兆鴻運幽潛被光晶六合甫粹純彬彬昭文明至



石西集卷五  
治不苟見鳳麟臻休禎生幸值斯辰聲振期終成隙駒  
易徂邁凡百懼交并乾乾念在茲無咎慎持盈  
山川標特拔望邑貫推古間出表異資歷歷著堪數王  
謨湛太虛成訓切衷腑敢墜嬉趨荒常虞侈召侮旣已  
摭造物還應樹元主穎脫發神蘊振翥武鄒魯  
在昔品名氏宗裔超郡先肇今自周明青紫奕葉傳助  
德燦史冊緒胤端承宣心教夏不泯口碑邇猶懸而子  
鍾彥達競業懷冰淵膺希卽舜顏胡爲辜華年

移家就隱南阿

有序

西城之外桃嶺之阿有茅屋數間乃先人所築爲讀  
書藏修之所號拱北吟窩余少時亦肄業其間新城

告完市廛互擾故甍携家聊以避俗時仲冬九日也  
兀兀坐南麓峩峩面北峰石林無野馬茅屋有潛龍已  
幸托篇簡從知銷鏑鋒鹿門存薄產投老且從容

謁西山忠烈行祠

有序

西山行祠在重興寺右祀余始祖唐越國公公嘗保  
六州稱吳王納款太宗累朝褒贈具載明典

古殿祀唐祖西山當寺門偉勛鑄越國寒日拜王孫草  
樹風霜肅岩巒部隊存乞靈瞻萬葉寵錫有殊恩

臘月朔日懷黃芝山

簷風剪剪朔鳥飛桂栢森森翠逼圍短景自知催素髮  
幾人堪與說玄機冰霜凍壓竹書富石圃陽生芝草肥



臘蟻漫浮春意動碧霄黃鶴幾時歸

寒雨不出

慣隱關常閉耽貧鬢欲皤地偏人跡少屋破雨聲多瓦  
缶分朱桶筠籠鎖白鵝北風忽轉凍雪意動吟窩

兩峰兄歸自京師授安遠掌簿兼致胡台岡光祿

詩寄

山城霰雪度殘年復喜春生草屋先拜祿已除南掌簿  
好風初送北來船窮居莫道無寒鯉光祿遙將有錦箋  
聖世妙齡須獻納白頭吟望德音懸

歲云暮矣

歲云暮矣携家南山竹松蒼蔚泉石潺湲茅屋旣補柴

扉常關鷄豚各晚烏鵲同閒栗里已許鹿門誰扳醴蔬  
乞貸僮僕往還德飽可服名虛何艱貞吾順易自彼顛  
頑綽綽言放蕭蕭鬢斑春生白室臘蝕塵寰出物形外  
叅天地間陶然一覺暢哉怡顏

丁卯年

計七十一首  
選十八首

正月一日

隆慶維新正元肇一谷風閒雲霽雪皎日知命登年遂  
安容膝蒼蒼林阿兀兀斗室市遠俗違筮從卜吉土堦  
棘垣繡帙花筆鬱鬱桂蘭彬彬文質友賓斯臨椒栢逶  
出酬酢賡吟酣娛達逸時乎聖明會曰真率貧憲旣耽  
願平甫畢悟通三生玄秘太乙



擬懷

陶翁性嗜酣家釀不常得愚生千載後此懷抱惻惻恬  
素寧見招侈豪未曾識恒固愛質慙伐先忌材直是以  
緘三謹每期機一息落魄竟曉夕何所豁胸臆昔知籍  
泯殞四顧悴顏色兵厨贖醞貯安得漸風翼

園居效陶

結構素乏資蕭疎就茅屋逶迤歷西南背郭足幽獨蘿  
簷倚玉堞塲圃綠麓曲潤漑旣激引芟培亦瘁鞠敢曰  
盜順利其如給口腹弱孫時撫嬉少足慰耳目老妻進  
濁醪任意不拘束每懷啓期樂却怪阮籍哭半百已知  
命輪遞一遽促天道信有馮善作錫百福旣往乃徵今

胡爲季主卜

夏日效陶

爲儒不厭貧貧固樂可久乃識天壤間而容此腐叟傷  
城數間屋繞屋數株柳好鳥變時音新涼生兩肘興來  
忘檢束聊復托杯酒旣醉發狂笑素書猶在手賢愚同  
一丘大藥誰授受但了此身外萬物一何有

夏盡

鄰鷄破午夢初醒點點霞峰到几明袖裏青蛇唐道士  
門前碧柳晉先生涼颼破幘知秋近赤日空山自虎行  
綉句滿囊君莫問且從雲外聽吹笙

秋入



午陰生石室涼意入秋天桓笛宜三弄陶琴少七絃鳴  
鳩桑葉下舞蝶荳花邊皓首關仍閉從教笑草玄

早秋山中觀史有感四首

去去流年迅隙駒寥寥郭外意偏殊光浮隱几披青史  
氣轉輕颺動碧梧恐向北門推鎖鑰虛傳東閣致賢儒  
誰云劍術爲身累自是英雄不惜軀

淹時窶空少經過五十無聞鬢欲皤鎮日滿城馳白馬  
幾人浮海着青篲簫傳一曲曾招鳳書重千金不換鵝  
樂在眼前誰會得萬峰深處紫芝歌

閉戶經旬非避客堆床萬卷自忘貧山中莫道無黃閣  
海上猶傳有皂巾三世報韓元起漢一言存趙苦嫌秦

衰顏不用悲遲暮直釣曾干渭水濱

經年病抱守居諸四壁千峰一敞廬投老幸無垂老別  
淡交應有絕交書功全鍛石非懷寶志在連鰲豈問魚  
聖聖相承墳典著逢人不用說玄虛

殘秋登石峰

秋殘葉亂飛振策俗塵微菊亦欺霜鬢風猶戀布衣野  
平黃稻熟雲煖紫芝肥白石誰能鍛空懷說息機

四哀詩哭汪鄰溪

悲風颼颼鳴寒泉凝霜迢迢愁遠天哲人萎矣徒哀憐  
廣廈頽矣從危顛雅音汨沒誰真詮通衢榛蕪橫狸鳶  
鍾期寂寥焚朱絃騷壇黷黯生玄煙嗚呼一哀兮淚紛



漣虛名海上有人傳

與兄同心含晶光與兄同志追明良與兄同聲吹芬芳  
與兄同懷遊徜徉兄駕發兮之何方兄倏歸兮餘黃梁  
兄乘雲兮帝子鄉兄永訣兮摧肝腸嗚呼二哀兮淚正  
長清流白石標文章

崢嶸壇臺分紫芝逶迤青谷巡溪澗蒼厓峭玉雲橫披  
晴瀾飛練光陸離紛紛交岐颺素絲蕭蕭白楊麋江蘼  
行行遲遲生愁思冥冥泉路盡交期嗚呼三哀兮淚霰  
垂少陵青蓮相娛嬉

行雲逝水何悠悠臨溪之堂堂之樓無復高人共倡酬  
孤榻寒燈夢九州途窮冀北空驂騑山南怪禽聲啾啾

樽有漿兮俎有饌挽長鯨兮招青牛嗚呼四哀兮淚橫  
流逍遙洪厓扳浮丘

歲暮三首

清霜激冬餘肅威淨群穢沍凍似不勝嚴明亦足愛萌  
茁陽已漸昭啓覬螫晦運乘須及茲頽逝不我再間業  
游竹素褐糲昔所耐謙履徵休祥銳臨媒駛退善集景  
如登訓存紳可佩質析或顧敘泉厓給獻對

晏歲課常儀邁邁促遲暮抱一弗離乖凡百籍坦素大  
鈞寘苟狗有生亦斲寓辱榮念已疎寧能移喜懼太上  
燭默眇庸詎越矩度研闡在忘疲敢勞穎達顧松柏挺  
勁姿恐爲匠氏誤深韜戾時好瓶口謝譖愬



玄都夙所懷一息未少替而令豁氣志豈曰適會際四  
序忽遞運冰雪戒凌厲生慮糾積疴素髮照短歲來茲  
尙爾圖曷以日月計弱波畫靈區虛舟或可濟玉斝昭  
姁和漑吸翫委蛻展武勿徬徨爲我說同契

戊辰年遺

巳巳年

計九十一首  
選三十首

雨後遣懷示諸生

輕嵐漠漠捲疎簾滄翠遙峰勢獨尖谷口嘯鶯音尙澁  
雨餘生菜味偏甜窮經有用通賢聖破濘誰能慰滯淹  
昨夜震雷翻地軸神淵想見起蟠潛

送友人之吳越

離懷各慘然况復艷陽天瀨隱嚴陵釣波浮范蠡船野  
花凝曉露輕柳挽晴煙勝眺多新句逢人好漫傳

寄黃芝山

惜別三秋暮添愁兩鬢絲可憐明月夜都是憶君時采  
采雙魚字丁丁伐木詩一樽花下約何日話襟期

行行且行樂篇

青陽司辰群物茁蟄鱗幽翎相通出煙霞萬頃迷芳塵  
錦繡千林耀白日殘英飛絮生春愁縱橫狐兔行原丘  
遺金耻作仍雲計秉燭還須爛熳游行樂及時時易擲  
青春一去頭又白功名身後等浮埃富貴眼前亦過客  
畱連不必較深沉潁川之瀾洶且深臨期莫聽易水筑



百歲何悲雍門琴乃知偉傑惜年少早旭纔臨忽晚照  
何須逐鹿嘆多岐直把千金買一笑一笑復一笑笑多  
愁不來起爲鷓鴣舞不放海螺盃紅裙珠履何徘徊鳴  
笙鼓瑟行相催觥籌交錯誰爲媒五斗一石醜顏開冥  
冥鴻鵠出霄漢紛紛鸚雀徒蒿萊古人古意樂若是今  
日今人意亦此此生幸際聖明時願將此意獻天子獻  
天子開脯筵霓裳鶴氅來群僊青鳥忽傳王母使玉液  
瓊漿祝萬年

春日游東谷復過田家十六韻

石谷虛仍敞山泉細可聽日融桃李徑風藹水雲亭到  
處皆芳草游人正踏青每應尋樂事不用嘆飄零野老

通時好田家倚翠屏謾携心切切坐對鬢星星款客開  
場圃呼童斲木苓檢書多樹藝翻砌似蘭馨午報鷄登  
柘醪傾玉渥瓶敞廬生錦繡溷世自羶腥淡話全淳朴  
高馮半窈冥情真非瘞鹿跡偶亦浮萍板築元徵像鉏  
將肯帶經垂衣逢聖主糲食惜頽齡好古遠黃口違時  
親白丁得償南畝願何愧北山靈

同諸貴公子野亭觀妓

淡煙細霧落花天翡翠光生玳瑁筵上客談詩揮玉麈  
美人送酒蹴金蓮不貪翰苑傳官燭漫憶香亭賜錦箋  
風檻水簾元自媚婉腰皓齒總堪憐

小閣對雨妻姪謝鳴甫至



鳴鳩出樹連村雨小閣鈎簾滿郭煙老病復驚春事去  
才華猶愛後生賢岩茶石筍窮居味隴麥墻桑四月天  
聖學明時元有待行盃索句思漫然

首夏山居遣懷二十二韻兼貽門下談詩四子

徐龍

川國光張學山子京謝耕雲伯興黃樵谷本誠

懶出關常鎖幽探俗自卑夏蒸禽語變梅熟午陰遲麥  
隴晴方穫秧疇雨復滋主恩遺地利農務卜天時已自  
依名教何勞問策龜久懷文舉座深愧董生帷日課三  
吾省言求一字師九重元不負百鍊復何辭萌吝經旬  
別高懸半榻私煙波曾寓釣江左總能詞有客尋荒逕  
呼童煮玉芝竹深雲藹藹風細草離離舊索文章價新

看桃李枝昔非知伯玉大夢覺希□敢效被衣癖翻爲  
失路悲情傾簪乃盍話久席仍移跋履誰云黍吟筇尙  
可支醉埋應荷鋪柯爛亦觀棋事要千年著名須四海  
知野人珍燕石漁父棄醴醢戚戚古如此休休樂在茲  
縱橫從跡躋素曲會鍾期

過武山祖莊

有序

武山鄉在城西四十里地名汪村乃吾家元季避兵  
之所石田茅屋先塚在焉

嘗聞祖德鐫名里直與仍雲作遠圖片片石田皆足水  
間間茅屋可儲租風和乳燕隨高下霧擁蓮峰半有無  
物物眼前存手澤茂林荒隴復啼鳥



偶興三首

聖皇啟洪運萬彙咸被化衡茅倚南屏微涼集朱夏苟  
羸亦伏吝屢空每餘暇有用且括囊何嗔曾出勝其如  
罹糾延陰隙不少假巍巍金臺資皎皎玉櫝價素琴閒  
虛曷袒裼坐長夜元化秉得一敢畫俗士駕

園居絕紛垢得暇念宵旰榮柯交陸離薄靄倏聚散生  
生遂成性豈解趨鍊鍛遮欄馴騶虞畫地棄狴犴耀騰  
啟獄秘音殊梧桐麤血驥騁萬里神鷹矚冥漢胡為較  
錙銖閉關謝隴斷

晴陰早晚殊蒸夏已半過避炎鎖竹關懶散停日課通  
物束九象獨抱疇為佐簷蔔玉枝枝枇杷金箇箇空庭  
自蕭疎陡磴從轆軻才非天祿疲義是首陽餓恒足不  
受辱過忍能乾唾天運苟有待埋照豈頓挫

東城觀漲

迅雷翻驟雨積濕晝昏昏蟄窟神蛟舞平原白浪吞官  
橋洄逆勢雉堞長新痕野艇波心葉寒煙郭外村暑樽  
誰為辨溪檻幸猶存想見巡閭峽遙應度海門滔滔津  
莫問不是武陵源

獨步庭下納涼

幽庭面碧岑散步似登臨瘦小古藤杖婆娑芳桂陰渴  
消山菓味涼入草虫吟好事能來否遙知共賞心

自釋



石西集卷五  
四  
總不好紙筆曰余兒亦三長已給俗役二三仍圖南得  
喪俱大夢何如終日酣聖賢具典墳對之逾清談窮居  
祗門席寧辭長者驟淡味餘冽泉濃陰自高栴疎癯杖  
可倚短素簪何堪真閒銷九鼎慎默容三緘驚人懷先  
民性癖言還耽此身亦外物臨化貽深慚

獨坐有懷

獨坐藤床意亦賒蒼雲漠漠午陰斜穿林百舌欲無語  
倚檻小欄都放花茗椀自能消肺渴冰盤何事戀京華  
好風忽送峰頭雨乘興誰來竹下車

醉後憶山中人

投閒日日醉一醉復何憂夢覺花生眼風清竹滿樓懶

雲思駕鶴動雨厭聞鳩皓髮商山侶高眠肯外求

寓感

亢陽威燁燁高樾蔭閶闔林棲事幽討緬焉生百感終  
期托遁蒙豈復戒巽坎風簷探物化萬象歸一覽嵐氣  
浮且重天容寂而淡乃知得遇心用取藉果敢

小園二首

拄杖柴門外移床石竹邊媚陰初見鵲貪露復聞蟬墜  
葉知秋近烹葵得味偏緣郊多小圃幽事最堪憐  
夏季暑猶酷林幽情亦賒老藤交紫實生菜半黃芽小  
子能芟草狂夫不戀花渴消瓜可剖安用問胡麻

早秋山中漫興二十韻兼簡弟粹夫姪文卿仁甫



實甫

石谷秋纔入風林氣倍寥簡編功有用絺綌暑初消弟  
姪吾家彥天顏咫尺遙病餘空老眼志銳盡青霄殆辱  
緣懷璧疎違欲棄瓢但能知疊疊不必問囂囂辟穀何  
嫌漢忘軀得避堯道行多孔厄樂在肯顏天一幸鵝枝  
借三便兔窟饒飽安能自會騰踏未須招業忝先儒籍  
恩懸奕聖朝藜然雖夜夜戶闔自朝朝燦爛早齊牧行  
歌尙越樵霞心時察察雪鬢日蕭蕭竹舞常來鳳松號  
或捲潮經鉏吟水隴倚杖嘯山椒野就田夫飲酣同穉  
子謔驚時從汗漫得意亦矜騎劈石偷靈髓探源擷藥  
苗黃芽新已熟白日看鶯超

西隴獲早稻

早稻應時獲行飈浥瀑涼瓜甜唇得味菊細鬢添香地  
僻無塵到林深有祟藏糲蔬分野餉淡朴似殊鄉

水濱

杳杳煙霞外依依竹石濱秋高宜拄杖句老尙驚人去  
矣思浮海歸與莫問津水涼風乍起消息覓鴻鱗

過東松故址弔岳武穆王

有序

邑西四十里舊有東松菴宋少保岳武穆王因討楊  
么曾駐兵於此菴有慧僧曰東松長老預知秦檜陰  
謀以言挑之武穆志在奉迎二聖弗之應後卒遇害  
石磴蕭條鎖薜蘿曾勞鉄騎此經過王師直欲清沙漠



鳥鼠徐看入網羅  
白日貫虹精氣在  
黃花含露淚痕多  
可憐二聖空旋蹕  
其奈奸臣數字何

初冬二首

林飈變寒候  
曝陽啓晨關  
玄機適相投  
丘園有餘閒  
遯晦節乃見  
扳榮途逾艱  
三良蒙幽闔  
四皓趨商山  
黃鳥生悲辛  
紫芝好容顏  
用舍貴逢時  
天淵跬咫尺  
間松喬乘紫氛  
放浪何時還

經營無定端  
形役亦蹇羈  
所懷希遠圖  
荒遐從何之王  
道非多岐風雲有常期  
白日忽踰晷  
華容移素絲  
四序遞韜藏  
葆光函期頤  
指舉連六鰲  
縱橫笑三尸  
長吟怡天和  
萬彙滋明時

高臥

病後功名懶  
寒先草木知  
深山忘氣序  
四海負襟期  
肯玷復三省  
能容常九思  
向平何日願  
高枕傲明時

長至

長至日長初  
霜高冰塞途  
暖回陽漸動  
窮盡病應甦  
四野無戎馬  
衰顏有醉逋  
神鷹空夢澤  
肯受俗人呼

相從行

相如不避威  
廉頗善釋疑  
酬過契勿頸  
能改貴自知  
君辱頽泰山  
身戕若等閒  
功名苟不全  
兩鬢忽成斑  
冲霄之抱常  
憾憾赤驥悲  
鳴肯伏櫪  
白日皎皎凌  
清霜長風颼  
颼吹沙礫  
征車磷磷  
征袍寒五雲  
光芒是長安  
出門



萬里倚雄劍丈夫何嗟行路難

山居年盡示諸子

破屋疎籬亦廣居衡門沁水復何如  
虛名肯負三千士大道曾傳一卷書  
老幹凌霜叢桂晚寒英映日早梅疎  
層冰欲破春波動收拾綸竿翫化魚

庚午年 遺

辛未年 遺

壬申年 遺

癸酉年 遺

石西集卷五終

石西集卷六

祁門汪子祐受夫著

同族後學耀麟叔定選輯  
五世孫宗豫武山校梓

詩

甲戌年 計一百四十二首  
選四十六首

山齋感古十二韻

煖破春猶早貧耽慮漸疎茅齋謝俗客竹素闡元初  
上德應含垢殊功肯尙虛黃金寫范蠡白璧完相如  
恨引王孫草光生帝子書不貪非效蚓無咎自求魚  
已許徐陵劔空勞魯巷車道存三代直樂固一身餘  
赤子心何失青眸日望舒切磋將老矣狂簡欲歸與  
卽見韶華冶



誰憐木石居和風熏弱線爽意到堦除

名園

名園賸輝榮花事半已了金莖盤雲芝翠葆潤石篠停  
策搜穎萃歷歷超物表情鍾一顧多俗迴衆喧少尊不  
尙師師弱能招小小大鈞肯緩轍幻態易夕曉綽矣阮  
何壽慳哉彭亦夭飄搖生層陰明當狎海鳥

送友人入西川

官亭把酒別離生送客西行入錦城六十流年看鶴髮  
八千里路聽猿聲草堂未必懷工部勲業還應頌孔明  
遮眼柳桃春又半素書何日附南征

坐雨

林幽市遠獨寂寂病後寒多仍昏昏老眼看花半遮霧  
科頭坐雨常閉門陰鳩有時喚屋角穉笋無數穿籬根  
明日會須泛野艇尋真直欲窮桃源

三月一日溪東

馥馥貪嬌舞嚶嚶繫敬思許多行樂地不是少年時選  
調迎供奉神工奪偃師新流還祓禊預有泛觴期

清明日美溪李黃岡見訪

錦里分襟忽十年青春一見兩漫然夢中細雨迷蝴蝶  
愁外千峰叫杜鵑幸有故人同樂事聊於散地結閒緣  
相看謾羨奇逢好草閣蔬盤興亦偏

林臯



惆悵首重搔臨風感二毛坦途閒驥櫪在野解鷹條藥  
裹關心瘦圖書送日勞誰能辭俗鞅共息此林臯

芳園雅集限韻

芳園雜樹近千株花既多名色亦殊黃始有芽終變綠  
紫非無豔恐妨朱投簪曳杖聯珠璧祖帳行廚競鼓竿  
自是石林朝市別從教醉眼笑疎迂

有待

論心三折簡有約頌休明久待扳蔬味曾來試屐聲群  
飛花亦恨盆舞蝶多情處處皆通濟何勞問耦耕

春暮謝春林至

素質臨修景高筵叙舊歡市疎便小隱林僻尙餘寒向

願幾時畢龐安聊自寬瓊漿分碧甕玉版出青盤密葉  
藏音巧飛英帶醉看綠沉煙裊裊朱幻雨漫漫蠹卷追  
千古蚨錢給一餐從知羶坐穩豈憚路行難可畏方題  
枉能言肯葢棺微輝憎草腐一震喜泥蟠去去瞻龍杖  
依依戀鶡冠聖明容朽散耽樂且盤桓

同諸子游西池

殘春杖履欲何之與客乘閒過習池金躍水心驚翡翠  
綠沈苔面破黧脂青樽肯負青山約白社都忘白日移  
三樂幸存名教地舞雩歸咏復裁詩

雜詩三首

園禽囀綠陰清旦覺候變焚香罷盥漱端默了聞見其



不西集卷六  
如寡悔尤豈解較最殿無爲望彌崇不售譽所羨功能  
回內熱氣欲奪尸戰三思服謹緘一軟懷高宴匪才棄  
明主終焉惜雅薦

大運局範圍形勞竟何補駐景遺鄧林而罹此憊苦孽  
孽誰善利歷歷一今古有恆盟鹿鷗無咎背豺虎敢云  
混元化分不外度矩上壽鑄金莖萬劫破玉塵爲我謝  
樊籠羽駕息鄭圃

負疴沮生慮漸與務役隔衡扉草樹稠一逕煙霞窄酣  
眠托神契落魄非守責高遠豈吝慕蹶趾鍛弱翮雖營  
紫河車尙愧青山客素書徵益損隙晷寓鼎革殊恩事  
空言皓首嘆虛席

首夏田家

蒼雲正午長百畝坐茅莊乳鴨貪新水芭蕉壓短墻逕  
荒苔跡滑鄰近麥炊香粒食纔充口胥驚夏稅忙

修景

露華迎早旭嵐氣散高林蝶不嫌殘蕊鶯猶愛茂陰夢  
回池上酌耕罷隴頭吟何以酬修景南薰鼓素琴

雜興

輕雲行陡厓微雨灑平郭涼陰盤復垂金氣淡而薄光  
凝石上華蕊燦囊中藥蓬矢旣的准瓠瓢從濩落胡爲  
事遐想四顧一寥廓迢迢坦且修物化日交錯徃吝棄  
郊麟來貞伸尺蠖聖道念在茲斯言誰復作素游切神



懇膺服豈外託納納何容涵冥冥竟棲泊

燕東郭池館

涼露淨方塘秋容抹淡粧弱將衰柳線堅欲飽蓮房繡  
奪鴛鴦小釵啣茉莉香合歡空勝地名教未相妨

深谷尋隱居三首

躋尋逾狂疎跋涉敢惜費振鳥探奇踪叢英散瑞氣乃  
知異人居氤氳猶蔽芾厓瀑淪石茗真得山中味身維  
閒是福趣用賞爲貴遙應醒費榮慎勿生嗔畏  
塵區亘今昔漢宇自夏杳仰矚玄冥孤俯臨衆垤小殷  
勤聆玉唾始覺俗喧少染衣多白雲馴食雙青鳥寒暑  
遞成歲豈暇較昏曉綺角近何如餘輝尙皎皎

誅茅陋結構倚石愛聳崛好閒日以偷居止坐蔭鬱嘉  
遯棄孳孳化生存物物恆產足力食白眼微赤紱永臥  
豈無成三分亦少屈冥鴻托碧霄翺翔謝弋尉

七月二十五日穫早稻南畝

有序

年邁俗冗歲歉徃繁南畝早穫饑貧少慰緬焉慕德

彌興鄙懷

秋平秬稻熟南畝告終成歛襟就田廬僮僕欣相迎辛  
勞積春初得食慰平生較歲敢全稔調時聊少盈爽風  
從西來涼禽深樹鳴孟糲龕亦鮮村醪濁還傾世產每  
懷德安遺胡不營作息竟何負餘情辭俗嬰

八月



松濤隱隱石瀾平八月初旬暑氣清白日忽驚三伏盡  
青山不見一人行秋成最喜烹鷄味社近難禁別燕聲  
搖落何須悲宋玉羽書想見報金城

涼風

涼風颼颼生茅廬石泉泠泠梧陰疎明窗皎露絢丹書  
美人不見空躊躇北邙寥寥盈丘墟昔年精爽今何如  
決明莎鷄交庭除坐看日月閒居諸出有輿兮庖有魚  
從教王門曳長裾悠然大夢酣蘧蘧白眼中原覽太虛  
人皆不給我贏餘終而有成返元初誰云商也能起予  
笑挽化人探華胥

獨飲效陶三首

中年好獨飲獨飲愁全消但得終日醉無勞故人招其  
如作病何止之傷寂寥彥先最知味栗里非餘饒百歲  
會有歸白楊風蕭蕭元化秉醕醢長酣盟松喬

中年好獨飲獨飲還獨斟不是耽幽閒多能乖賞心時  
因易代謝物與皆浮沉敢掃席上竹相關樽前禽涼風  
吹單衣天末起層陰貪餌無完魚傷哉廣陵琴

中年好獨飲獨飲辭是非且盡眼前歡從教身外違默  
默旣存道昏昏仍知機釜出蟹螯鮮盤堆芋栗肥羅浮  
或可尋槐安還相依萬緣托酪酏雙眸空翠微

送李生源少還美溪

連朝並榻細論文斗酒殷勤惜又分一逕幽花欹瘦石



長空老鴈叫寒雲詩成白髮誰憐我鼎熟黃芽却憶君  
隴樹迢迢秋欲暮陽關疊疊不堪聞

醉吟

謀醉乞比鄰行吟字字新知非曾補過戒得豈妨貧竹  
下青藜杖風前白葛巾瓦盆餘勝事泉石有遺民

十月一日遣懷二十韻

木落馮厓雨颺回賸郭煙翥空雙唳鶴膺腐自吟蟬志  
道心元古從人哂癖顛百憂衰鬢改微命弱絲懸質愛  
單衣結貧忘敝履穿專能趨俗殆受垢衛生全鷲石猶  
欺宋金臺久棄燕病貽多口累言許異方傳土瘠科妨  
切窓明課用偏小陽冬始入酣夢晝應便去去那能挽

乾乾各勉旃時流潛伏矣聖化灼依然達益三餘後虛  
存一覺先文章違正命印藏締閒緣幸忝珍儒席寧忘  
德頌篇見知雖未徹風槩亦堪憐白鳥波還並黃英石  
更鮮敢勞宣室召終擬華山眠永啟爐中秘吟成竹上  
鐫物華從此老須判酒如泉

古意

末路走稜氛中天懸寶照元化寓興沒毋勞費言弔此  
意切須臾誰能悟旨要安得同懷子參寥闡洞竅饑餘  
石間髓懶過峰頭嘯乖遇局鈍銳胡爲較耆少生事逾  
佯愚大維似不肖振衣躡遙風萬仞一以眺

息駕行



威凌破屋竹帷寒，氣壓層巒霜樹丹。不是遲遲鄉念切，應知邁邁路行難。殊恩未荅心猶赤，半百年過髮已白。肯叩王門曳素裾，曾卑帥閫干雄策。長安惡少梟隲徒，槌牛博塞非丈夫。丈夫志決萬人敵，彈丸擲戟胡爲乎。君不見烏盡弓藏，龍飛劍化名遂退。身晝窮還夜高歌，長醉何須醒。閉關請迴俗士駕。

早冬西山遣懷

停策西山陽，徘徊蒼樹林。寒雲被緼袍，蕭然滌煩襟。平疇旣以穫，遺穗馴鳴禽。洗耳聆清泠，翹眸眺嶮嶮。遠近自成墅，鷄犬杳深沉。餐薇日邈冥，風高良所欽。昔感慮亦遣幽，尋情還任巖。花間渚萍點，點生華簪。

搖落

搖落一冬盡，蕭條生事微。谷深門久閉，日晏鵲初飛。古道斯文萃，衰年宿願違。未須愁屢空，猶解賦來歸。力食田園裕，香炊芋粒肥。兒童欣自得，鄰舍舊相依。晚節金盈把，寒陰碧十圍。遂安曾固德，坐對亦忘機。百忍任乾唾，三思還佩韋。莫辭琥珀盞，珍重薜蘿衣。

過馬懷石端居室訪汪楚石

山城肅氣鼓行飈，一室端居遠市朝。架上品籤何色色，堦前殘葉正蕭蕭。回班卽見趨金馬，辟穀還應訪石橋。試劍彈碁酬短序，玉華雲液得相招。

山行



行行且避諠望望寒陰屯採藥留山價聽泉借樹根晚  
風吹破帽斜日下荒原笑詠歸田里應知達者尊

郊西雪霽

冥冥連日凍喜霽一開顏倒着風前幘來看雪後山群  
鳥饑欲死獨鶴不知還最愛隆中叟高吟尚閉關

復贈黃芝山

隱翁欲止酒因之二十止吐納見真性逍遙通物理勞  
形復何如適意斯已矣巍巍三丰翁綽綽赤肚子高眠  
上士顧一唾仁風起欲償方外緣冰雪戒行李紫芝猶  
可餐吾將就黃綺

阻雪簡洞寥子

病後好狂復好懶寒多白晝始開關窮途雪積車猶阻  
小洞春生奕正閒點注老梅初破臘蕭疎華髮總成斑  
長吟一覺希□夢皎皎冰壺照古顏

歲暮村莊絕句六首

村幽寒較重日晏興還乘淺涸魚迎懶低迴雉避鷹  
凍飽層層玉香微點點花春煙鷄正午竹裡有人家  
相對且徘徊相看笑口開臘殘春漸近頭白客初來  
瓦缶醪方熟山爐芋更香雖因稚子獻亦許鄰翁嘗  
市隔非無路山環恰似城燒餘愁草色濤密愛松聲  
竹光穿葛幘梅意泮冰壺得就野人飲何勞天子呼

立春前一日遣懷



瞥眼風霜又白頭蕭然環堵草堂幽山梅忽報春來信  
斗酒難消歲暮愁蔣詡尚存三逕竹鷓鴣欲買五湖舟  
陽和卽見均田野帶索行歌有鹿裘

乙亥年遺

丙子年遺

丁丑年遺

戊寅年遺

己卯年遺

庚辰年遺

辛巳年遺

壬午年遺

癸未年遺

甲申年

計一百二十首  
選三十六首

元日

龍飛一紀開元運六十七年老更強自信威名俱幻夢  
由來道德有輝光驚雷化鯉神先覺擇木良禽舌合藏  
辟地南屏堪小隱寒陰晚節鬱蒼蒼

同程四石謝少泉野集

氣序遞輪迴青陽駛逾半晨明罷盥漱歛襟坐日晏良  
朋有好懷芳郊陳彩幔盃行春滿筵草藉玉爲案祗緣  
嗜疎野胡乃罹羈絆嬌姿自銜媚巧語交招喚迢遙波  
溯泐倏忽雲聚散慙勤罄餘歡何妨較月日



春日山居荅諸生

冉冉晴絲滿目斑青春皓髮照酡顏石泉石竹石邊石  
山鳥山花山外山拚醉欲謀連日醉偷閒能得幾人閒  
亭臺有約開吟社爲道先生懶出關

過村舍復集谷口

入村風古朴迎客禮疎違榻有瓦盆酒人多蘿薜衣露  
涼松鶴瘦波暖石鱗肥面面皆青眼毋勞較是非

首夏遣懷有贈三首

清晨媚修景首夏交蒼翠痊疴藉盤礴百務慙委寔好  
閒匪良圖亦各就其志周孔雖長生阮陶豈眞醉虛涵  
玉壺冰質潤瑚璉器出處何殿最達室一寤寐榮榮蘭

蕙姿肯爲滌溺漬來茲爲陳辭兢持毋自棄

驛岐何紛紜衡茅自曉夕萬金一刻娛遺骸覆阡陌宇  
宙僑逆邸期願亦過客始卒決須臾豈復論鼎革綱緼  
物我一齟齬天淵隔冥冥謝弋尉安得漸風翻韜秘慎  
鑄緘不銜誰皂白渾沌鑿倏忽賊戕竟何益

後生良可畏可畏俟來者文質諧彬彬先進還從野叢  
榮慚枳棘孤植表梧檟譽虛徒媒矜器備肯飾假不善  
善之資趨失逾下下聖言唾珠玉親炙切陶冶悟融腔  
渥春端秉意拴馬耄矣懸青眸髦齡慎操舍

月夜泛舟寺潭

晚涼多逸興朋好復相求白月隴頭樹清風潭上舟鐘



石西集卷六  
聲來古寺笛意近高樓鼓柷歌漁父沙汀起睡鷗

寓感十首

晝永茅堂靜風恬石蕙香喜蛛絲巾幕行螳隊侵床業  
薄依恒產家乘服義方一貧無長物豺虎未應妨  
黯黯煙初合輝輝日漸高贈袍何眷戀投筆亦雄豪古  
道復誰見榮名不世遭鶴書塵外想天際一鴻毛  
洞口回僊仗峰頭過玉笙河車乘姹女藥草長金莖牝  
牡常營衛桑田幾變更道傳心已許何日卜終成  
老去惜分陰偷閒亦眺臨風雲三尺劍水石百年心且  
就竹林飲胡爲梁父吟趨承酬宿好短髮不勝簪  
瑞獻芄芃麥榮收片片花有言遺野莽無夢到京華劍

履三千輩簾櫳百萬家著書忘歲月一逕老煙霞  
白晝披僊籙玄霄列少微遙遙藤竹杖蕩蕩薜蘿衣水  
湛魚蝦美山空笋蕨肥苟耽今日是何憚昔年非  
南薰敷聖澤北極下天章廣陌騁騏驥高梧停鳳凰此  
生何際幸吾道倍輝光崛起羲皇後遺音續漢唐  
積雨不勝愁愁添復喚鳩欲傾鸚鵡盞須典鷓鴣裘澗  
鎖登山屐濤驚泛海舟故人音問斷長倚仲宣樓  
百丈飛晴瀑千峰插翠巒紅顏徒自飾白眼不須看欲  
效蘇門嘯猶妨蜀道難歸來無限意一曲賜黃冠  
久臥夢中夢羈縻年復年誣言要呪咀寸地有神僊滑  
髓鍛丹金嘉禾叢玉田天威嚴咫尺直北五雲邊



南屏四章章五句

橫岡逶迤開南屏盤雲松桂常青青誅茅馮麓結幽亭  
暇日數來高士駕深宵還燦少微星

南屏老人心太古焚香獨坐拂玉塵太虛浮雲從散聚  
錦衣鼎食封塵埃樹鳥池魚作賓主

纔堪容膝卽爲家清時雨露滋桑麻治園好種邵平瓜  
堆案圖書認孔孟還依北斗瞻京華

臨風長嘯復長歌縱橫岐路俱網羅高眠不用嘆蹉跎  
紅泉白石青林下賞心樂事何其多

東墅訪隱者漫成三十三韻兼貽之

蘿垣圍石墅草閣坐山隅自在鶯求侶將飛燕引雛丹

成還有用玉韞不須沽可對皆修竹何拘自坦途索錢  
胥吏少盈几聖賢俱禮樂推前輩文章屬碩儒重囊藏  
燕石彈鵲棄隋珠道在名何負年躋事亦殊每承恩浩  
蕩猶慎敬斯須瑣闥元非偶關河豈可踰疴痊逃二豎  
善積泣三姑慙駐韶光媚俄驚氣序徂自臧還自咎相  
應復相呼得就龐公隴寧追范蠡湖貧緣非法界咫尺  
是神都此老方強爾諸生已矣乎步趨循邇遠收拾認  
精粗白玉固難玷黃金未易圖誰先超一覺我後待來  
甦海岳忝三友乾坤歸大爐閒應窮物理瘁不愛肌膚  
業已乘龍杖助寧佩虎符海鷗元可狎塞馬任長驅會  
晤曾看奕馮凌亦擲盧舒眉光皎皎坦腹氣嗚嗚索詠



能千韻謀酬在百壺矢心酬國士多事著潛夫立圃春  
常滿西山日欲晡掃霞蒸白石封土瘞青蚨誕也爾爲  
爾真哉吾是吾肺清憐栢苦骨立愛松孤祗合裁狂簡  
從教笑腐迂附蠅猶佇倚展驥莫踟蹰

坐暑

損損每招益勞勞還受謙曰身能自愛於道復何嫌水  
荇千條弱蓮峰數點尖但貽詩酒債終不負陶潛

早秋西館

滿城蒸酷日此地颯清涼不蠹書千部無絃琴一張且  
扶筇竹杖堪着薜蘿裳三嗅有餘味風荷十里香

今日行

昨日已去又今日今日流光非昨日昨日今日大不同  
不同祗恐又明日涼風颯颯吹輕裘腐草殘英都是秋  
紅葉御溝猶致意琵琶江上不勝愁遑遑日月亦過客  
啓照纔臨忽陰夕不以紫奪朱須妨蠅點壁君不見鼎  
折足食無餘漠漠浮雲度太虛爭如吳松一筍魚

倚杖

嵐壓高林晝未開臨軒倚杖獨徘徊半生樂事只如此  
千古功名安在哉大道冥冥思辟穀朱衣袞袞羨登臺  
無常一刻陰須惜迅發明朝節又催

九日行

九日山空風怒號前山後山競登高山嵐霏霏濡山袍



山花點點侵二毛二毛蕭疎願未畢忽忽年登六十七  
青山不改人事非安得長繩挽斜日倚劍長歌有所思  
掛冠解綬歸來遲功名蓋世變灰燼好製荷裳烹玉芝  
且簪頭上花莫放掌中酒山人山花年復年年長醉  
九月九夏閻老身首異處嚴閻老暴尸牖下張閻老斲棺受戮其子孫安能保哉曾中丞驅西北之戎誣遭大辟胡司馬殄東南之寇痛訣囹圄其勲業良可惜也漢嚴子陵退耕富春周陳圖南高眠華岳宋魏仲先之東郊林君復之西湖而世祖世宗太宗真宗焉得而屈之哉則山林視鍾鼎天淵之隔矣

酒熟

蒲萄已熟潑新醅鬱抱於今得好開看竹每過栽杏地  
談兵更上讀書臺正風肯爲群情變垂白那堪兩鬢催  
欲挂片帆週海宇龍章何日報蓬萊

卽事

玉案琉璃盃彫駮翡翠裘路窮雖可泣天墜復何憂  
已非懷寶魏冠有沐猴寧知塵外想小艇翫滄洲

殘秋郭外

霏霏錦葉下晴巒郭外殘秋亦可觀石菊渚蘋雖作色  
風袍葛幘不禁寒籬邊已待陶元亮海外猶傳管幼安  
最喜歲功徵小稔田家茗椀對蔬盤

漫成三首

駒隙遑移晷寂立非延生元元命靡常懸象遁虧盈至  
人握真符群醜徒誼爭百骸吾何有長嘘抱未平愁扳  
三山盟笑就五鼎烹巖瀨旣高尙傳巖徒崢嶸頽仆寧



石西集卷六  
匡持還從南畝耕

正氣表孤植空言寧受招少微列昌台鳳凰儀簫韶曠  
適每揚睂何干肯折腰羅弋眇征鴻冥冥萬里遙輕諾  
亦苟合白黑變昏朝日余竟何心終焉混市朝翹首一  
長吟寥寥颯寒颼

寶鑑懸清霄昭瑩絕紛塵何欲斯何爲六合咸賓親已  
承恩浩浩猶愛禮循循易水懶擊筑桃源慚問津志士  
存淡交豕鹿往來頻肯負登山屐常懷漉酒巾理在復  
何疑三五重具陳

寓館對雪寄樵雲斗東

雨散寒林雪作花殘冬小館惜年華綈袍戀戀非能事

蓬鬢絲絲每憶家老去尙容餐玉髓陽生想已度金芽  
卽看暖意催梅柳好辦春醪待鹿車

歲除遣懷

摧殘風雨歲應徂玉韞經年尙未沾適興但能浮竹葉  
安居不用換桃符深藏穴鼠猶妨突直上霄鷹肯受呼  
準擬春來尋內典投盟市上認懸壺

石西集卷六終



石西集卷七

祁門汪子祐受夫著

同族後學耀麟叔定選輯  
五世孫宗豫武山校梓

賦

悼生賦

曰天道之杳冥兮胡有生之弗辰踰黻髻以何怙兮歷  
歲月之艱辛弔形影之斃予兮復躬事乎百務侯乾乾  
以惕厲兮敢少替乎晨暮咀孔孟之遺馨兮直溯游乎  
虞黃判竹素於膏晷兮聊展驥乎文場何群生之辰古  
訓兮競佻詭以斲喪乎精魄蔑典刑而背繩墨兮捨畿  
甸而驟騁乎蠻貊遂罹忌而顛沛兮竟誰氏之可依轉



石西集卷七  
流離以逐萍蓬兮悵曙是而暝非瘁陳蔡而莫能容兮  
亦何病乎大道眇卞璞以等燕石兮豈終湮乎粹寶雲  
漢敞而不可梯兮乏應龍其難攀徒號咷於窮原兮繫  
誰啟乎天關蓬瀛渺而不可躡兮况弱流以畫柂盼玉  
宇之萃靈伯兮鍛六翮其寧濟濯潁川之澄潔兮茹商  
山之霞芝嗅柱史之清芬兮歛漆園之玄思道在邇而  
涉乎遐想兮切心神於一悟違坦途以陟峻坂兮夫何  
晉乎跬步逝日月而年奄耄兮韞負德之忡忡託芹菹  
以繫永懷兮抱炙獻之怱怱冀上帝之降衷兮飲下民  
之悞悞沈抑鬱以弗暢兮樂帝命以偃蹇曰仁義以膺  
服兮莫險誦之誰何虛萬境以舒嘯兮矢泰清以颺歌

心涵遂古要義皇奠撫兩儀彰三光白雲爲廬蘿爲裳  
騷盟濟濟歆華章郊游麒麟鳴鳳凰玉芝甘露兆時昌  
尸餐帝德終難忘還騎飛龍游帝鄉帝子眷注相徬徨  
俯睇六合俱茫茫手握長劍倚洪荒

### 山居賦

嗟帝命之弗齊兮樂天爵以何求嚴一介之取與兮維  
身心之正修卜禎祥於四體兮察費隱於方策推所受  
以廣益兮值隅迷而莫闢雜茅棘以壅蹊兮奚正路之  
可由馬玄黃而不晉兮車輶軻而逗遛浮雲興而倏沒  
兮慨逝彩之可惜晨暉驚而西傾兮恨分陰之叵借鬢  
欲變而齡頽兮憾世往而貽吝敢攀鱗而附翼兮煌璧



玷而罹釁九乾嘿而莫余鑿兮徒控切而憊傷八延坦  
而何不容兮託養晦於崇岡聊疏壑以結構兮負層厓  
以駕壑姑容膝以寄傲兮坐環堵於林薄侶藪澤之麋  
鹿兮來九臯之鳴鶴謝塵郭之紛囂兮欣洞谷之寥索  
開荒徑於石林兮追曠迹乎蔣王游神期於曩昔兮時  
賓致乎求羊拾茶薺於嘉圃兮瀉茗蔗於髡觴啓壤歌  
以昭休明兮諧鸞音之鏘鏘發逸思以臨眺兮振飛鳥  
以陟巘翳桑麻以接畛兮感沃野之蕃衍飫椒糝以佩  
蘭茝兮要松喬以辟穀凌紫氛以析寶訣兮遲韓衆之  
白鹿揚霞裾以延佇兮岸風憤之翩翩竦栗乎其不可  
羈兮歷逶迤以廻還逋鸞鳩以竄斥鷄兮芟蔦薜以艾

蕘施息樗櫟以停策兮撫菌桂而娛嬉淵可釣而浪可  
濯兮復苔臥而石盤芝可茹而髓可鍛兮束萬象於粒  
丸匣龍泉而弗拭兮塵陰符而慵觀醒魍魎於陰闔兮  
許偃佺之扳干貯竹實以培梧枝兮俟鸞鷲之儀止步  
虛明以駕嶽瀆兮表哲人之素履亂曰山中人兮恬且  
娛化鈞融兮形氣殊生慮空兮天壤俱沐雨暘兮備蕘  
芻谷之盤兮溪之愚神不痺兮德不孤心皇極兮揖烝  
徒胡衆役之蚩蚩兮鑠物欲之烘爐

登白石峰賦

有序

邑南之最高山口白石峰距郭七里許而麓至絕頂  
復三里焉遊眺者每憚其險巖咸弗果所願歲壬子



余既仁輔期以九日發興值雨復遏越十日始霽迺  
載酒偕良朋以申夙約遂作賦曰

領石林之嘉遯兮發清秋之奇思指南郊以展武兮歷  
雲嶠以棲危闢丹厓以敞谷兮緬囂紛之杳杳綠幽澗  
以滌襟兮探梓源之渺渺既窮邃以騁遐想兮復振裾  
而梯岡盤逶迤以巡卷阿兮尾樵迹以相將捫虬龍而  
披迷榛兮媚喬林之蒼鬱緩展齒以襯軟茵兮嗅寒英  
之芬萑引長盼以躍霞頂兮宛日月之可握接大荒以  
眇丘垤兮倚九霄而罔覺感造物之表奇幻兮浮晶玉  
之峻嶒擬祝融之柱炎嶽兮歛山靈之驕矜縱西顧而  
森錯戟兮負歷峰之送目西八十里見歷山杳冥漢而獻青標

兮來天都之轟轟

北一百里見黃山

俯石城之嵯峨兮疊市井

之縈迴擲雙虹之偃臥兮踞東山之文臺悵人事之弗

余悟兮胡交岐之絡繹屏四美而辜二難兮睽嘉盟之  
可惜舒長嘯以醒沉疴兮遂盤礴以怡神吸雲壘以融  
六氣兮收萬境之鮮新忿峻吸以妨往哲兮弔孤柱之  
久泯毓神秀以貽淑姿兮幸茲辰之導引諱曰天高日  
朗激涼颼兮乘風遨遊懷飛僊兮響遏行雲來美人兮  
離離愉愉萃斯文兮君子假樂焉知其餘兮

春日登東山書院賦

粵青皇之司辰兮回萬卉之華滋鼓谷風之習習兮涵  
熙陽之遲遲維碩人之潛姿兮息游業以興思藉郊坰



之容與兮拾岩壑之芳蕤日崇臺獨奠於東南兮標玄  
冥之區宇麗飛甍以觀霞岫兮炫檻欄以輝牖戶闢華  
堂以惇文宗兮懷二翁之砥柱正祀朱文公從祀環谷先生列陪從  
以昭賢宦兮覬來茲之踵武何愚生之後皇王兮慨時  
事之化遷姑臨眺以豁囂慮兮諧景象而夤緣橫雙虹  
而疊埠兮走擾擾之虬螳控萬井而浮煙兮引歷歷之  
墟里峰簇戟而參差兮波獻玉而縈旋妙心神於一晤  
兮察淵漢之魚鳶舒長嘯以吸彩兮獨超邁乎物表咀  
聖澤以扳溯兮覺凡區之窈眇緬回首以歛襟兮馮誰  
氏之迓招挾飛鴻以覽青冥兮受無爲之先而逍遙亂  
曰青陽易謝兮白日馳文臺昭明兮從娛嬉飄飄乎其

不可遏兮永將海嶽之休期

復初賦

粵遂古之肇命兮日皇王之降靈萃二五之凝竅兮托  
幻蛻而賦形既均受而率修兮何物我之各異別廉溷  
於一判兮招哲愚之奠置仰廉哲而巍升兮流溷愚而  
不醒戕玄珠而孔斲兮趨愈下而冥冥長太息而痛哭  
兮藉伊誰乎力挽幸斯道之未泯兮孰余鑒乎衷懇義  
農宵而典彰兮周孔化而儼斯惕晨夕而激溯兮回源  
派於念茲胡遑付而迂矚兮眇泰岱於一顧豁中洞而  
朗悟兮趨蓬瀛於跬步憫擾擾其崩析兮亦莫敢余控  
也將汲汲以彌縫兮嚴噩噩之取舍神既暢而颺邁兮



握洪蒙而倚大荒要萬古於瞬息兮駕六翮而遨徜徉  
恣渾蕩而無常駐兮絕靈臺之渣滓廣嘘吸以被遐方  
兮遏氣機而企始重曰動其中兮搖其精蕩王風兮詭  
佻行時不昌兮道不明余之生兮際鍾英望太空兮鳴  
何平枉橫流兮扶頽傾復皇初兮營終成贊天地之旋  
斡兮運萬化之生生

鄰溪草堂賦

有序

祁閭之水發於直北之大共源又東北之芝溪源西  
北之和溪源派流而合於城北之石闌干河口下注  
於靴石潭左市祁山右巡東郭南走閭江而達於鄱  
湖焉東郭之埠上爲井亭汪氏世居井亭之裔名舜

字用中者構草堂以馮滸渚額之曰鄰溪自號曰鄰  
溪子貯書萬卷以娛清暇而石西子與鄰溪子又宗  
好中之最密者也日就游詠會悟襟期爰捉筆爲之

賦曰

繫名區之肇闢兮鍾山川之秀奇峰盤迴而峯聳兮水  
迅激而漣漪溯北上而竇濬兮潑清源之夔渺合二流  
而南走兮巡山郭之護遶維佳人之偉侔兮悟絢境之  
邃幽架草堂以倚滸兮俯軒檻之澄流領石鱗之游泳  
兮信波鷗之上下豁浦渚之宏曠兮逐荇藻之秀野情  
旣暢而神怡兮運物物之化機閱晨暮而綢繆兮辭役  
役之是非貯竹書以娛暇兮判冥冥於上古來斯文以



析義兮駭俗偷之孺豎局百韻以啓秘兮列綺繡之篇章  
味三復而賡歌兮瀉瓊玉之卮觴倚中天以長嘯兮  
竄八荒之魍魎妙腔燭而不可羈兮出萬劫之塵想亂  
日溪之水兮滸之堂涵虛明兮坐瀟湘裔華胄兮籍冠  
裳承懿德兮流晶光來美人兮諧疎狂翫玄圃兮吸瓊  
漿堂兮溪兮謀永臧吁維千古之鄰兮膺帝澤以洋洋

漢江春夢賦

有序

汪子子吉蚤嗜詩詞迦遊襄漢感交甫之奇姤覽太  
和之玄標浩蕩煙波艤棹均滸景與神會遽然而夢  
有晴野生春之思旣而歸隱楂山術鳴岐黃利物濟  
人布衣蔬食志綽如也夫何歷年逾曠厥嗣彌艱詠

眺之餘恍然自失石西子解之曰仁者必有後但修  
人事以俟天命爾於是悟襄靈之夙兆倡江漢之重  
遊迹詢舊侶采納漢川得泰伯之裔期望而子誕焉  
噫神交德種胤卜廿年奇足傳矣况子吉與余義忝  
同宗交爲莫逆素履僉譽令音可紀遂欣然爲敘其  
事爰作賦曰

繫立渾之均賦兮導繩墨而不違備衆類之孔靈兮舍  
德義其焉歸騁雅節之相羊兮恣蘭漿之所適拾江漢  
之浮萍兮覓襄均之靈迹維青陽之秉令兮吐萬葩之  
芬芳倏黃梁之幻蛻兮逐蝴蝶之翩揚矚天柱之霞城  
兮炫五雲之廻翔歷立都以周覽兮豁白日之昭章旣



石西集卷七終  
引領而超悟兮出心神之灑脫感化機之眷駐兮冀潛  
修而運潑作嘉善以降祥兮器瑚璉以鍾之亘歲月而  
弗替兮值休明以受之重曰春暘遲兮萬華睹嶽之麓  
兮江之濟維玄靈之幽降兮兆德人之申甫

石西集卷七終

石西集卷八

祁門汪子祐受夫著

同族後學耀麟叔定選輯  
五世 孫宗豫武山校梓

書

奉和溪先生書

巳酉

維先生歷事兩朝兼司五省其匡君澤民之術籍籍著  
於耳目如祐之不肖亦得數承清訓諄諄不倦真所謂  
黃耆達尊不屑教於倥侗顛蒙之後生也君子曰山有  
僊則名水有龍則靈然一邑一鄉之中豈不有人以風  
教化以嘉淳龐乎先生人之粹者也而鼓舞奮勵冀附  
驥尾者不可枚舉矣然而求其親炙會晤則未見焉故



利祿者爲之說曰不士則商何其井蛙之局隘乎夫賦命於天作業在人氣體均一善利異途嗜慾深而天機淺彼此之隙孰能審之是必闡道鍊神包括六合以至於無端倪五倫也五常也五行也萬事萬物也溯而至於太素太始太初太易融融焉洞洞焉孰有孰無參寥冲漠而無碍於遙蕩恣睢轉徙者斯人也狂念人也固執人也古僻人大笑者若存若亡者力而効之者有不免焉然悟而守之者在我達與不達我何與也是故囂囂然綽綽然顛顛叩叩然貂券組綬不足以奪其氣志五音五色不足以滑其耳目牲鼎膏蘭不足以餌其口鼻調吾氣怡吾神以發吾分內之韞上可以扣盤古

之天闢下可以注被於無窮不少蒙其滓孰知其爲葛天氏之民歟無懷氏之民歟斯言也斯意也固君子之惠誨也匪敢與衆人論之故於老成鍊達者告之

與黃芝山書

壬子

祐竊謂天地間生此等人必會此等理幹此等事遠可以追往哲邇可以啓後生終可以則來世要使元氣全古道惇斯文倡庶不負應奎壁鍾河嶽食龐德爲斯人之表表者也稽之邃古代不乏焉魯仲連張子房嚴子陵其人矣故身居巖壑之下與豕鹿木石同處而造化綱常賴之以爲根軸天子諸侯緣之以調休治百工黎庶仰之以卜咎亨其所以抑奔競黜浮薄挽淳龐勵貞



操真可以追古啓今而則來世者矣祐於此而有感焉  
有愧焉有不幸焉有大幸焉言之及此不能無長涕太  
息者也當今聖天子在上萬國彬彬而草茅志士不少  
沾恩典以褒祖父之光將老死溝壑而無聞焉此可感  
也徒蘊珠玉秘綺綉不能出一言畫一策以贊聖治以  
靖邊釁貽天子宵旰之憂此可愧也值少孤貧瘠而多  
病母老又寡兄弟溫清之餘負米不暇東僑西徙鮮有  
寧日雖有全志而無全命此不幸也然蔬粥足以供朝  
夕遺書足以豁塵眸溪亭山閣足以散藜杖吟詩把酒  
足以致和氣其視元老受戮司馬磔屍縉紳桎梏而無  
完膚者則又似獨出於萬仞之表與造物鴻濛而相容

與相羊其大幸又何如耶是知感也愧也不幸也大幸  
也殆天也非人也生而值此順受之宜矣豈可矯揉縱  
錯以僥少伸乎甚至卑汚降辱患得患失以競苟營乎  
但人事旣修天意不假志士憤焉區區守此以俟來命

祭文

祭叔姑黃孺人文 辛亥

維姑蚤承家訓克遵女則長適名門謹循婦儀三十居  
孀七袞登遐子媳在庭四孫森立嗚呼休哉姑其榮矣  
嗚呼痛哉姑其逝矣祐忝血戚爰謂有文可乏一言以  
著姑德百拜頓首迺作言曰萃二氣之元精兮維碩人  
其鍾之佩先民之遺矩兮於閭閻以範之作芳齡之苦



操兮延皓首之凜栗垂懿訓之嚴惠兮保諸孤之德藝  
期黃耆以無疆兮藉徽音之孔彰胡重光而淵獻兮越  
厲立以訃傷悵涼飈之蕭颼兮慘萬木之索落懷淑人  
之永逝兮痛丹悃而莫托冀瑤池之逍遙兮賓王母之  
御宸服瓊襦之妍麗兮啣麟脯之鮮新神雖漠而愛猶  
邇兮儼音容之在在潔椒糝而侑桂漿兮乞精靈之歆  
采切蕪語以獻蚤頌兮著嘉憲以洋洋重嗚呼以申哀  
哉兮永嘗格以尙饗

祭胡青丘文

癸丑

繫大塊以垂範兮植綱常於四維慨萬族之擾擾兮蔽  
物欲之蚩蚩惟碩人之崛起兮柱頹波而不倚會河嶽

之粹英兮惕乾乾而疊疊幸斯道之未泯兮賴版籍以  
遺彰歷日月以闡悟兮啟蘊奧而吹芳邇黃虞以介紹  
兮飲心精之炯炯痛流俗之戕弛兮竭丹衷而挈拯仰  
太清以長吸兮睇漢魏之門墻拾屈宋之遺芬兮肯受  
羈乎晉唐獵湖山以垂翅兮傲泉石之修潔倡雅社以  
寓娛兮揮雲毫以擬乎松雪胡立渾之弗錄兮履桑榆  
以沉疴竟悠往以永訣兮趣斜日之輕波緬音容之偃  
蹇兮徒托目於丹旆炙遺珍於散帙兮追浪迹於杳杳  
曰吾儕之荷眷兮激晨夕之忡思置生芻於一奠兮冀  
嘗格之在斯悵明晦之殊途兮切虔悃而莫告亮精靈  
之弗替兮聊用歆乎宿好



石西集卷八終

附

士倩先生傳

先生故越國裔也姓汪氏諱伯薦字士倩先世自祁之十四都武山鄉徙於邑西門遂家焉高祖德育廩於庠蚤卒曾祖子祐以詩名於時祖廷品父世成咸世其家學世成公旣娶黃氏連舉二子長先生次伯茂卽出游學於荆楚旋聞入蜀未幾母孺人黃氏病卒遺先生僅十齡弟伯茂八齡堂上唯有王父母年高不能撫二孫二孫因往揚州依舅氏黃公德舅氏家故饒視二甥如子教先生以業儒教其弟以服賈先生旣冠有文名明大義日念王父母不去懷於是辭舅氏歸代世成公奉



養王父母王母故程出因令先生娶程氏女爲室以供其甘旨先生藉甚文場中試輒高等補邑學生歲得廩銀俱奉王父母無私畜王父母喜曰吾孫讀書成名能代吾子以養吾二老人也先生色養之餘設帳鄉邑間祁之才俊子弟多從游經其指授皆得售以去遂爲時名師年三十九膺崇禎戊辰恩貢之選庚午入南雍肄業爲異日除授有司地及撥歷歸而王父母倚閭之心慰矣時世成公出游三十年無隻字歸省人或語先生曰爾父已歿矣先生飲泣於心恐王父母高年聞之必致疾日奉甘脆如故而夜則涕泣不休床簀間盡濕間一問及詭以無恙對無何王父母年皆踰八十先後以

壽終先生殯殮一如禮先生乃大慟曰吾向不能踪跡吾父者徒以王父母在耳今幸旣殯成服矣人不生於空桑父在不迎養父歿不歸骨何面目立於天地間遂乃斷髮誓天重趼千里放宋朱壽昌棄官尋母故事祈必得徧歷荆湘巴夔間物色之歲餘竟無耗先生臨江不濟曰人子不幸失所天雖百身莫贖今吾窮人無歸矣惟有死葬江魚之腹耳同行者極力諭止之曰爾祖妣大事未襄而又輕身於一擲若敖之鬼不其餒而是重不孝也何以慰祖父於地下先生哭泣不食者累日勉從之歸因爲王父母承重服其服者各三年又爲世成公服斬衰三年哀毀骨立幾於滅性爰奉世成公之



衣冠葬於十四都之武山歲時伏臘上塚哭盡哀聞其聲者無不淒絕腸斷云服闋更自責曰吾旣不能孝於親朝廷亦安用此無父之人爲故事選貢得就有司職雖資格有限而州縣郡丞皆可唾手得非久次需貢者之比先生旣自責遂絕意仕進視選貢一官猶敝屣也誓布衣蔬食以終身旋值鼎革遁跡深山尙未罹鋒鏑之患順治戊子祁城破於江右之叛弁焚殺不已白骨青燐所在而是先生間關千里挈家避亂於維揚先生蚤誕二子長君宗豫次君宗觀宗觀出爲先生之弟伯茂後獨長君迎養先生於邸舍始猶拮据漸乃光大長君善心計操奇贏以游江淮不十年而資埒程鄭爲高

堂華屋鮮衣美食奉先生凡有可以娛心意悅耳目者無有一而不備先生喟然曰吾未能養吾父遭世亂離苟延性命於今日尙忍受吾兒養乎衣取蔽體食取充腸此外無需也性故善飲喜賦詩遇酒盡歡避地以後遂不與宴會不接賓客淡焉泊焉無營無求而已矣君子悲其志以爲此卽大舜終身之慕也居恒惟以克承先志好行其德勗長君其他置不問曰此固爾所優爲也每遇春秋佳日則出游市中携錢數千於杖頭以施貧窶子錢盡而歸明日復如是曰吾爲吾兒造福也疾將革顧謂長君曰吾所恨者二事吾未見爾舉子又吾曾祖石西公有詩百餘卷以貧故藏於家未刻吾今以



屬汝汝其勉之吾目瞑矣年七十六而終元配程氏與  
先生早同艱苦晚共安樂者壽考彌強猶及見長君並  
舉數子芝蘭繞膝含飴爲哺長君官鴻臚之日躬膺  
封誥

欽賜歸養浹歲而卒享年八十有四其後福視先生尤  
侈云

康熙己未季夏之吉同里後學陳希昌撰

附崇禮堂詩

祁門汪伯薦士倩著

男宗豫武山較梓

五言律

元日漫興

飛嵐洗玉泉風日麗晴川酒喜迎元日詩窮送去年有  
思驚鶴髮何慮息狼煙謝客便高枕虛名不用傳

覓栽竹

借地可栽竹從君乞數竿人皆貪筍味我獨愛陰寒此  
日謀根固何時約客看瀟瀟如在耳雨意下晴巒

感遇二首



峰盤蘿逕賒竹覆午簷斜入夢池生草驚春筆放花遼  
東仍皂帽勾漏亦丹砂爲道南州客東風鬢欲華  
干戈雲外急草屋隴頭寒畏俗存三窟逃名覓一竿吳  
儂連月泣蜀道此時難梁甫誰相問高眠懶戴冠

曉起

曉起氣方淑窓橫日已高言言過百舌面面入鮮桃尙  
事卑彈缺何干笑鼓刀流光春又半短鍾附新醪

澗屋

石澗團山舍茅簷亦故家鳥聲花樹煖竹色夕陽斜好  
客開場圃移樽味菜蝦細論卑市井幽討足桑麻

對雨

菜肥初出圃松老故遮簷點石錢莓潤穿堦穉筍尖堯  
夫貧亦樂鮑叔困還廉大夢樊籠外何勞問滯淹

晚過南谷

蘚逕穿林暝寒煙帶郭疎田家搜犬豕佛舍送鐘魚國  
已蘇元命村猶急吏胥夕陽啼鳥外歸興並樵漁

賦得

妙理空黃卷浮光老翠華樂兼閒是福貧以醉爲家久  
潤憎楹礎新嘗嗜石茶霏微連日雨落盡一庭花

啓窓

啓窓厓霧近披卷竹涼生衆妙該三教真閒了七情池  
邊皆草色屋上亦泉聲莫謂林居拙清才屬晚成



蜜窩尋友

石屋真巖麓柴門曲岸濱竹疎皆鳳尾松老半龍鱗幻  
有煙霞筆麗多太古民隱翁曾托跡手澤尙遺新

雨夜

颯颯走窓紗冥冥復夜斜近床燈暈薄到枕雨聲加氣  
序只流水愁心空亂麻明朝呼酒伴乞醉又誰家

養晦

養晦逢迎少經秋感慨多祗緣生意別無奈衆誼何白  
眼只謀醉青林好放歌竹書閒几杖三逕未蹉跎

涼晚漫興

古木迎巢鳥斜風送夕曛遠山初過雨新堞半含雲逐

日勞夸父烹鵝負右軍郊墟涼漸入深夜得論文

窺園

淹時猶伏枕力疾更窺園拄杖通葵逕移床坐竹根栗  
梨秋老味烏鵲日中喧白石誰能煮玄機祗自論

入谷

脉脉隴雲賒巖扉傍日斜山深號鹿兕臘盡見梅花古  
幹曝霜色凝泉交玉華濁醪宜解凍谷口有漁家

七言律

元日

山雲乍捲朔風寒元日蕭條強自歡屋角竹松畱晚色  
堂前椒栢獻新盤孤吟敢謂明時棄萬里猶嗟行路難



野服葛巾形體外石峰深處就遺安

遣憂

堦前拂柳啼鶯近戶外叢藜着屐難紫綬可憐焚紫閣  
黃庭祗合對黃冠風高鶴夢迷松逕日煖春光到藥欄  
世路久違真懶出敢勞蘭漿待江干

對史有感

太史遺編功久著小窓細雨淚偏長古來孝行歷堪數  
此後寒溫良可傷聖世每容阮籍眼青春欲斷子臯腸  
哀哀罔極茲何恃在在音容念不忘

尋山僧不遇

林煙已散客初到塵榻都閒僧未回堦下一群求食鳥

雨餘無數臥錢莓行看法界諸天近坐對殘經萬劫開  
欲待遠公償夙願暮雲峰外動春雷

避事

久厭囂塵懶入城殘春易擲鬢星星消愁累日眠糟粕  
服食何人與木苓松逕竹林行處有石泉花鳥醉中聽  
括囊莫論浮生事得句還應闔戶庭

積雨

經旬積雨廢登臨首夏流鶯已變音寶鼎久違鍾呂約  
青編都會孔顏心窓前草色迎星硯床下泉聲入素琴  
無那隱憂消短序一瓢聊用對華簪

首夏山居荅丈人



荷衣麥飯足生涯首夏西原處士家玉逕可通天闕近  
槐陰不散午簷斜圖書架架無塵蠹野水田田有亂蛙  
敢負丈人遙折簡疎閒久已厭芳華

地隅

久鎖玄關謝棹輿萬峰深阻水雲居疎狂好酒亦鳴世  
貧賤驕人爲著書燕冀有臺推郭隗茂陵多病棄相如  
柴扉信與丹丘近縹緲天風送步虛

病懷

謝病秋林少客過滿庭風雨亂雲蘿山中宰相久辭穀  
洛下先生新結窩得句且應酬躑躅扶筇還擬陟嗟峩  
鹿車鶴氅心期在翹首蒼旻放浩歌

郊西遇隱者

平郊已獲正蕭條早旭行林露半消木石肯容新鹿豕  
溪山不禁老漁樵橋邊進履復誰覺谷口當壚解見招  
道在任教流序易還將醴脯話松喬

五言絕

卽事

窓露浸幃寒城鍾促曉發何處夕游人歸來踏晨月

百舌

怪舌弄新晴言言如得意哀婪效百禽鳳鳥故不至

夏夜

愛月故登樓樓高月正幽忽聞吹古調句句不勝愁



卽事

晏日收殘雨飛英散紫泥偶尋林下約忽到浣花溪

絕句

白日欠幾許青山剩大半變態苦不整昏旦數聚散

七言絕

獨坐

南薰拂拂醉初醒細雨霏霏烟滿庭獨坐焚香心太易  
一簾草色抹新青

游紆源口號

磴入紆源洞洞開風林浴日午徘徊一聲何處迎天籟  
爲有幽人看竹來

卽事

紅雲霏霏滿地愁獨倚危欄岡上樓無那坐林鳩意惡  
聲聲喚雨不曾休

漫題二首

屠龍的鶴近何如久伴青山閱玉書樗火任教熏醉眼  
柳條空自繫雙魚

看山自信能揆古教子原非爲代耕爲問當年同志者  
於今斯道幾人行

淡夜

星散平林夜欲分誰家砧意破寒雲關山咫尺望不極  
白月青樓正憶君



崇禮堂詩終









